

日本
撰述

本朝高僧傳


二十九
三十

特279-318



279

318



始



第四百七十七號

文部省書庫


本朝高僧傳卷第二十九

濃州盛德沙門

師蠻

淨禪三之十一

京兆南禪寺沙門德



釋德見號龍山總之下州香取郡平氏子桓武天皇

之裔也母氏娠時夢吞日輪處母胎十二月既生聰

慧不喜混俗至年舞勺投相之壽福師事寂菴昭公

暗記法華不勞復習思慧夙薰尤通義理徧通外典

五車該覽菴嘆為再來人十七具滿律戒服左右無

難色叅謁一山和尚于鹿山同求掛搭者四十餘員

山指禪牀日各試呈頌可者許參堂見授筆立成卽
居侍司年二十一發志南詢菴許遠遊密付心印維
時蒙古與吾有惡船達四明不許著岸見自謂古人
爲法亡軀今正是秋也夜潛登戒投身雉堞墮豪貴
庭中平擒捉家主問日何因至此見索筆書日我在
日本聞天童和尚道風故遠來將禮拜其人素歸宗
門憐見惻誠白官獲免攜登天童具陳來由住持東
巖嘉淡志令歸堂及巖人寂竺西補席命充侍香辭
往吳門謁東洲古林又遊江西諸名山駐錫匡廬東
林暨至分寧平山濟川相續住雲巖雷見分座四衆

仰危州守舉住兜率時寧州官員諸山耆宿備香華
旛蓋護送青蛇一頭盤法座下人皆異之乳香酬寂
菴一居十年百廢具舉議者謂悅禪師之再來也謝
事寄客大龍翔集慶寺笑隱新公下榻待遇寧俗頗
乞再歸兜率及返本朝歲六十六當貞和五年也左
武衛將軍源直義請住洛之東山太將軍尊氏源公
奏主南禪天龍德臘俱邵公侯士庶望塵拜伏歷三
大利巨闡禪風朝廷聆其聲價特賜真源大照禪師
之號南禪小叅今朝陞座一期事已周此晚小叅更
復何說矧此事人人本具觀體現前猶如萬里無雲

十日普照有甚遮掩處直得離一切有無離一切幻
化離一切浮虛離一切真實語言不及比況不得知
不可知識不可識坐斷千筵路不立一纖塵應聲應
色卷舒縱橫無拘無束得大自在豈不見羅山開堂
方歛僧伽黎珍重便下座闍王近前執手云靈山一
會何異今日好諸人若識得羅山與闍王相見處三
世諸佛諸大祖師種種要妙一一玄機以至山僧所
說細大法門一時識得無絲髮許透漏唱日夜渡歸
本便歸本待得天明見日頭上堂目前無異法遍界
絕遮欄卓爾超然正體獨露雖本來而不涉本來離

住著而未嘗住著所以道祖師心印狀似鐵牛之機
本則印住住則印破一向把斷要津若聖若凡如何
揅足放開線路俯徇時緣便見主伴交參風雲會合
再轉法輪於知足天上重映道光於末運之時艸木
叢林增顯煥九州四海樂文明延文三年中冬十日
邁病名諸弟子囑以後事十二日沐浴而寢中夜起
坐被新淨衣書遺誡數紙侍者請偈見乃書日西漏
東沒南往北來末後一向掘地深埋起出戶外仰看
月色已斜復歸座誌偈尾日十一月十三日放筆而
化春秋七十五夏臘五十七門人窆定身於東山知

足院樹塔曰靈淵

贊曰古稱丈夫蓋棺毀譽正定若夫出世悟達之人
日用現前自然契規待蓋棺堪作甚邪真源禪師為
活南詢捨身戰城卻免久難異域本邦轉大法輪其
末後大就復甚奇異可謂初中後前生死太留脫著
自由也

筑前崇福寺沙門宗心傳

釋宗心字即菴拜大應國師妙年削滌及長遊方徧
踵叢社大應言下馳求頓止出世筑之廣德歷遠豐
之萬壽筑之報恩崇福三刹四方景從月堂規公贈

偈曰橫嶽峰頭古道場單傳妙旨復提綱全機度越
今時令幾使祖宗眉壽長後主洛之萬壽心將順世
說偈曰一踏踏翻如來地一拳拳破祖師關閃電炎
中山河走天堂地獄譬如閑敕謚弘宗普門禪師塔
曰正宗

相州建長寺沙門祖輝傳 智越

釋祖輝號獨照平安城人得義翁仁公之法初受與
州太守之請住松島寺徙筑之聖福相之淨妙洛之
建仁終升建長所歷四太利咸整法令能事云畢元
弘五年二月二十四日說偈曰生處如幻空來如電

生从公來打成一片即時脫公敕益真覺禪師又有
釋智越字雲山久參無隱範和尚遂承印券出世圓
覺後移淨妙宗說兼貫列刹所崇晚退禪昌菴臨終
謂徒日問佛佛不知問祖祖不會百不會百不知是
誰生是誰从

紀州興國寺沙門思賢傳

釋思賢號無住世姓藤氏華山院右丞相家忠之裔
也慕法燈國師之禪捨錦綺隨毳衣久之有所悟住
紀之興國洛西妙光道價負重創相之聞修寺為第
一代理長壽寺殿尊氏源公奠茶佛事日承靈山記為法金

湯大展叢林戈甲豈止爭先旗槍點出無邊春色與
一切人換骨洗腸個是仁山義公平生常用底號令
即今俯水獻花公也度蓋云青兔蓋裏雪花香賢滅
後門人樹塔鷲峰日晉濟有弟子香林大震等不數
世而絕矣

京兆東福寺沙門士顏傳

釋士顏號中菴不詳姓氏長安城人承南山之印訣
漫遊諸方曲箋翰於壽福乘塵尾於圓覺開堂策之
承天遷相之崇壽終升東福不振法幢延文元年七
月七日化于莊嚴菴有謝世偈日七十四年不談禪

道夏問如何七顛八倒

相州建長寺沙門友丘傳

良睦

釋友丘字東林幼師一山和尚圓頂受具之溟人元請益名納所得尤淡依育玉月江和尚主藏秉拂名聲且著及其告辭天寧楚石琦公作偈送行日十月朔風號古木金陵遠也行何速菩提達磨未來前淮北淮南山簇簇不立文字直指人心旨龜值木輓芥投針從本以來無佛祖了知此事非今古國師侍者意如何汝負吾兮吾負汝丘既歸國出世建長一香供一山尋住圓覺某年月終于雲光菴又有法弟仲

和良睦侍者自少英邁不幸短折遺偈曰清風吹碧落明月照青空一唱還鄉曲調高興不窮睦與太虛充少林眷友善二公賡韻助哀建長圓覺禪衲屬和者四十人少林萃之作帙義堂信公序益為時輩所愛如此其為人可以見焉

京兆建仁寺沙門仁浩傳

釋仁浩號無涯不考姓譜羽州人也得鐵菴生公之印攜錫入元謁名宿歸住肥之淨土相之東勝洛之建仁辦香酬鐵菴上堂達磨不來東土佛法只是這個二祖不往西入佛法只是這個只這個從來撲碎

不破卓拄杖曰那吒頂上喫一掣金剛腳下流出血
重陽上堂玉露滴開八枝九枝之黃菊金風剪下三
片兩片之丹楓大功不宰不同而同取之無禁用之
無窮現成公案百市千重喝一喝曰恰似猢猻喫毛
虫冬至小參目前無法意在目前不是目前法非耳
目之所到恁麼說話不妨滴水滴凍水泄不通驀拈
拄杖曰且道在衲僧分上合作麼生卓一下曰掀翻
海岳覓知己撥亂乾坤建太平復舉雲門大師曰觀
音菩薩將錢買胡餅放下手元來是個饅頭拈曰雲
門大師如是告報也是官路取私鹽以延文四年正

月初五日寂于永源菴壽六十六塔曰審明

京兆天龍寺沙門志玄傳

釋志玄號無極平安城人順德帝四世裔也幼事南
洲海公于願成至舞勺年落巾受戒東寺習密久而捨
太叅無爲元公于東福圓覺透得本源聲播叢林元
德年中夢隱國師住圓覺寺法席鼎盛玄負氣不顧
有僧縱史謁見國師素聞其名延之上座與語機契
擢爲版首國師再住南禪復舉分座出據臨川貞和
二年國師付七處說法之衣紹天龍席會中多士濟
濟如麟鳳之猷漫皆歸玄輪下助化辨衆事凡住龜

峰閱六寒暑鐘鼓交響整頓宗教光明皇帝屢幸聽法寵賜甚渥上堂示眾曰諸佛不出世亦無一法與人說然迷妄眾生造迷妄業隨其業力輪回六趣是以大禱薩埵修空華萬行坐水月道場降鏡像魔軍成夢中佛果然後隨病施藥遂有三乘十二分教如將蜜果換苦葫蘆福智一嚴只破空有之習海諸人業根而已生佛為之分矣今時叢林說禪說道者如稻麻竹葦觀其舉措多逞伎倆因茲後生晚學爭機鋒於棒喝之間且道旨物瞎棒能拔生外業得麼胡喝亂喝能救生外苦得麼豈不見道參須實參悟須實悟

實悟如斬一綵絲一斬一切斷然後向千聖仰望不及處抄出父母未生已前面目直是風凜凜地方可稱為大解脫人只能如此何憂不辨乎退院上堂拂柄提持經六夏為人無法作聞熏如今山下藏踪跡不類別峰看德雲休老于聚景及國師唱滅奉詔再住天龍大衆悅懌解印退居舊院文和三宰降南禪之旨玄以老辭延文四年中春屬微疾謂門人曰吾十六日行矣至期聚眾遺誡坐逝享年七十八坐臘六十六諸徒龕奉塔于慈濟救謚佛慈禪師玄雄辯強記當機不讓一日華嚴講師謁雲居菴問難宗旨

國師引華嚴證之講師笑曰經無此文玄在徧日關
黎只知舊譯未知新本和尚所引在新譯經關黎自
宗猶且不委欲探教外之旨可得乎講師赧然玄有
語錄曰天龍一指

贊曰玄公者正覺國師第一上足所悟純白無世智
塵當其機前有青藍處一家諸弟常畏敬焉觀其師
資之間宛如雪巖欽公之於無準和尚也再膺受天
龍命晚謙光南禪詔嗚呼松柏之有高標也雖飽風
霜而爲人所瞻仰焉

京兆東福寺沙門士昭傳

釋士昭字鑑翁嗣法南山和尚有博識高行之名在
天龍居版首受帖出世歷遷之後至慧日山都下稱
風長壽寺殷莫湯佛事日佛國香樹正覺果熟二甘
露門一味無別喚作濟世術三十年坐柳營而建太
平喚作活國方百萬軍望梅林而得止渴惡毒時卻
平和瞑眩處也辛辣應變臨時受用無極遺芳千載
屬甘棠子葉孫枝陰鬱密賀釋書入藏日四海清平
一事無討論文籍萬機餘喜聞敕下龍宮啟祕在元
亨釋氏書閑休審壽菴延文五年十一月四日書偈
而寂

傷載延壽
傳燈錄

京兆東福寺沙門一鞏傳

釋一鞏字固山源姓肥前佐嘉郡人母夢圓鑑禪師以盃盂授曰後當還我持之入內有孕而誕容貌殊異鄰亂父攜詣高城寺謁藏山和尚鞏進問曰和尚名何山曰無量鞏曰我是無邊山知法器耳提面命舞勺落髮往筑之觀音寺登壇受戒正安元年一山西礪雙錫東渡留太宰府鞏特往謁礪授無中之號贈褐十七上京之三聖叅無爲元公又往相州侍西礪于湯藥礪問萬法歸一一歸何處鞏曰黃鶴樓前鸚鵡洲礪月之隨藏山住東福歷試要職叅南山月

船松嶺直翁諸老得_ク以_テ知解貞和元年出世東福懷香報藏山文和初年升天龍警策四來法令三載投老正覺菴延文五年正月嬰小恙預書遺誡數條二月十二日病革侍僧乞辭傷鞏乃書曰來時空手去時赤腳一公一來單重交析投筆告寂春秋七十有七門人遵遺命葬于圓鑑禪師之塔左扁曰正光

京兆正法山妙心寺沙門慧玄傳

釋慧玄號關山源姓信州高黎氏之子其先清和天皇之裔也器度高介抵巨福之廣嚴菴拜東傳啟和尚剪髮真沈默衆底無所點化適值開山大覺忌

赴于西來菴門同列僧曰海內叢林誰稱活手僧曰
洛之大燈國師殺人不眨眼因語其作用玄聞忻然
曰是真知識也即日束包菴下直上大德方丈厲聲
曰新到相看國師據位纔展炊巾便問如何是宗門
向上事峰曰關玄拂袖便出峰曰作家禪客天然有
在從乞掛搭峰令侍者曰若要掛搭先須持紹介來
玄曰夫善知識者具金剛正眼才跨門見徹學人心
肝說什麼紹介峰許叅堂玄頓機俊發一夕無端衝
破關字亟到丈室告其所悟峰拱手曰你再來之人
也初來前宵吾夢雲門大師至故示關字而今透徹

如是宜號關山仍證以頌曰鎖斷路頭難透處寒雲
長帶翠巒峰韶陽一字藏機太正眼看來隔萬重親
炙左右唱酬契機後醍醐帝詔峰入內峰偶不安命
玄赴詔帝問不與萬法爲侶者是什麼人玄起鞠躬
奏曰不與萬法爲侶者是什麼人帝以手中圭畫一
畫曰者個聾玄便退身稱歎帝情元德二年峰付法
語曰此事卓犖挺拔清虛乃佛乃祖惟以之而務苟
有其人則於壁立萬仞處輕輕推將去到不回頭時
節直與個惡辣手脚全體作用使佗到勦絕白的之
地古人得肯之後深隱堅韜不必長養虛廓之聖胎

專亦有意憂於後昆者也。上人既與本來相應，起居幽邃，受用確乎切須，綿綿不通風，密密緊護，恰恰時異日將吾道而光輝，便是不孤負老僧徼困之恩耳。玄公入濃之伊深山，盤結艸菴，沒迹鍾光。延元二年，峰示違和花園上皇遣中使宣曰：和尚百年之後，朕隨誰問法？諸法嗣中得大機用，人願承指，故峰奏曰：有關山者得吾骨髓，天生風顛，居無定處，我滅後宜徵詢之。中使回奏，上皇重遣藤原相曰：朕將改花園離宮以成梵刹，而請關山住持和尚預標峰進呈，以正法山妙心禪寺之名。上皇乃審厥象，俾旁訪四方。

式日在濃之山中，其形惟肖天使，入山具宣聖旨，玄堅坐不起。天使勸之曰：國師哉！化上皇失南鍼於霧海，大法付托幸屬于師。且有國師遺命，安得自便乎？玄幡然曰：公之言然也。徑入花園，上皇大悅。艸創妙心特降，款黃開堂住持。上皇就丈室，後別開玉鳳晨昏入室，造佛祖闔域焉。玄不拘威儀禮典，唯以向上。一著接得四來，非大機大用者不能窺其藩牆。嘗拈趙州柏樹子話，示學者曰：柏樹子話有賊之機，衆無契者。永源寂室和尚會裏，僧來相看，玄日聞飯高。山平日禪坐，是否？僧曰：不敢。玄日試坐看僧，偃面壁。

日本書紀卷之二十一 高僧傳卷之二十九
一
跌坐。玄曰：這掠虛頭漢，連棒趁出。又見僧來，參便罵。僧曰：某甲爲生，凡事大特來參見。和尚因甚怒罵？玄曰：我這裏無生，你便打趕出。一時屋漏，玄急召日持。器物來，一童亟持。盆、籬來，玄大賞之。或有索施桶來，玄叱曰：者鈍顛，預堪作何用？信州高梨氏通世譜好來，拜謁。次見屋朽壞，謂侍者曰：益葺補之。若其資用，我當辦之。玄聞而罵曰：者俗漢來相看，則止管我屋上作什麼？或爲客設浴，浴主曰：薪既盡矣。玄曰：毀撤欄版，猶有餘薪。晉請摘茶，會細雨下，濺山謂知事：奈何？霑溼清衆，須伐茶樹來，就庫內摘之。住山號令峭。

峻如斯。嘗會夢窻國師，便問金翅鳥主當宇宙，未審天龍藏何處。國師卽藏屏風後，山繼行而拜。當時人稱曰：一師有出羣之作略矣。在審山時，大燈國師每赴村齋路，有小蛇蟠屈，垂頭待僧。或爲誦咒而過，玄一日從行，蛇復出焉。乃拾石擊殺。國師顧之，莞爾。一日束裝頂笠，告授翁曰：我今行脚去矣。相攜到風水泉樹下，立談出世顛末，泊然而化。屹如槁木，遽報。一衆扶奉，全身窆于本山。艮隅樹塔，旃以微笑。實延文五年十一月十一日也。享齡八十有四，坐夏六十有四。玄機宇高敞，因事世緣，殿堂不雕，道具不飾。至紹

藤作袈裟環自巖梅礪茹以至為王者歸敬始終如一室無剩物獨有兩朝宸奎一篋往日大燈國師在時稱舊叅者雲山峨公為上首十又六人國師唱化後歸玄會中峨遭打出二十五度其餘可知焉以故嗣其法者唯授翁一人耳救謚本有圓成佛心覺照國師後柏原帝陞妙心位相並大德為祝聖道場從玄創建至今垂二百五十年隆樓傑閣繼究輪奐兒孫汎汎遍於天下也

補入

寶永丙戌

今上特降

贊曰柏樹子話者標的宗門鐵樞子鐵蒺藜難為下口縱明三藏教講師至此指口又突五車書儒者至

此結紫關山國師別具天眼下正拈提比于雪峰言臨濟大有白拈賊手段峻又一崖可謂截斷佛祖命脈瞎卻人天眼且余需國師語句而無有焉幸個拈語落在江湖古人曰若其賞音一夔足矣國師平素愛栲栳禪嫌瑠璃禪坐斷本分上不在軌則邊纔有陰界氣者不能望其崖今稱法孫者盈乎日本及琉球此皮栲栳之禪與是瑠璃砢之禪與

雲州雲樹寺沙門覺明傳

釋覺明號孤峰平姓與之會津人生有夙慧看佛書合爪不輟七歲密母父令就鄉校無意世典願從事

桑門十七依良範講師下髮登睿山受具足戒習台
教八禪究性具之旨既知有宗門事參法燈國師于
鷲峰問如何是學人自己燈曰卽今問底是誰明卽
領旨燈曰聰明利智須求妙悟然後自胸中流出蓋
天蓋地若於文字言語中學得來底如數他寔於己
無益服膺三載益臻玄奧參了然明公于羽州專注
禪觀偶看僧書力盡神疲無處覓只聞楓樹晚蟬吟
豁然了悟趨欲呈解然見其來把地爐火筋匿背後
曰汝道火筋在什麼處明曰從來在和尚手裏然首
肯曰汝作後坐斷天下人舌頭在講高峰日於雲巖

南浦明於橫嶽咸以法器稱之罷參之後菴居信州
應長元年附舶入元參中峰和尚于天目親蒙獎識
尋見元翁信古林茂斷崖義雲外岫抵天台山謁無
見觀公居第十座因陟石橋供茶於五百羅漢感盞
中現花下到護國拜佛眼塔東歸依南浦于建長命
居版首不就北往訪瑩山瑾於洞谷山問本朝支那
參得何邊事明以手指曰面前法堂背後方丈山呵
呵大笑由是駐錫相與博約山記曰汝緣在雲州行
矣無滯於茲授菩薩大戒曰盡未來際無令斷絕明
乃往雲州字賀莊誅茨棘居年五十五人敢無親疎

之無何歸鄉者衆室無所容檀施雲委鬱成叢林先是嘗夢一僧持刀擬其臂且授雲樹二字曰作後雲門靈樹太至是徵所夢名以雲樹開堂拈香爲法燈之嗣有僧宿杵築神祠夢神語曰爲我求雲樹和尚戒法并僧伽梨僧以告明詎大社說戒付衣其衣現今存于社中云元弘初年後醍醐帝狩伯州詔山行在受戒法衣益特賜國濟國師之號親醮宸翰賜天長雲樹興聖禪寺之額及大駕歸洛復至關問道詔董龍山明堅辭不就貞和元年鷲峰虛席衆延致之明日先師道場不敢離杖錫而至雲水奔赴盈八千

指寺遭舞馬之變荒蕪者甚明力舉之未幾有加於舊法燈嘗曰吾滅後五十年有一大士再興茲寺於是皆謂膺燈懸記又徇衆請住洛西妙光大將軍尊氏源公弟直義將創伽藍延之三請不可夜竊逃太後村上帝繼先朝志留神宗門名明宸廷寵崇特厚帝與皇后太子受衣益戒法加號三光國師錫金襴伽梨救泉之高石建大雄寺詔明爲開山始祖開堂日大駕親臨四衆懽呼謂靈山付囑今猶儼然明感兩朝之恩遇爲終焉之地康安元年五月中泚示微疾二十四日集衆激勵曰吾行矣門人覺賢智訥請

未後句明日出息不涉諸緣入息不居陰界又曰視
死如生視生如死生死無隔豈有一法可當情耶言
訖長住享壽九十有一坐臘七十有五帝聞訃不勝
哀悼賜香幣救百官會葬火浴得五彩舍利無數士
民淘沙土搜艸莽得之者多門弟子分之塔于寺之
西隅京之妙光雲州雲樹應安戊申門人仲藏主人
元國講枕之淨慈住持用章俊禪師撰塔上銘焉
贊曰明公法燈國師第一的子悟解相似志操相似
壽齡亦相若也心證照晰戒行玲瓏南帝相繼崇嚮
爲師源公三請掉頭不就矣當時與頤頤蓮幕而求

利達者涇渭隔止賜三光之號自然而然乎抑亦有
因緣乎爲異也而已

京兆萬壽寺沙門明千傳

釋明千號古鏡蚤參清拙和尚得悟又遊元朝參謁
諸老依樵隱逸公于雪峰司藏經隱逸淨慈千亦從
侍密銀顯鍊益臻闡奧在元二十年而東還源丞相
講住洛之真如乳香嗣清拙遷信之開善洛之萬壽
輦下挹風者衆矣延文二三年九月初八陞萬壽齒列
五山之位千上堂曰萬壽本爲皇后寺將軍今賜五
山名山僧坐著黃直袂搥鼓毘堂祝聖直菴愚首座

起龕日終日如愚一生擔版無端與佛同涅槃切忌棺木裏瞠眼喫鐵蛇鑽破鐵門限一日於典庫贖法衣一頂矚其衣裏有二圖璽卽是迺祖愚極及樵隱之所印也千大喜日法王大審自然而至卽令搗鼓上堂敘得法衣之因緒先是樵隱自修雪峰塔銘言天荒地老扶桑日本其永元一派流入東海之論於是徵英文和丙申春千捨檀輓印刻百丈清規書其尾云龍翔笑隱百丈東陽迺天下名師也同時奉敕以重編校正百丈古清規本定元朝叢林之盛典也版禮數顛末便于觀覽者東林兩本之所不

及矣予故募緣繡梓于版以廣流通千延文五年五月二十二日邁病坐化

筑前聖福寺沙門宗規傳

釋宗規字月堂號冰月老人姓宗氏筑前太宰府人也母夢抱彌勒佛聖像寤而產師自幼啟慧嬉戲常作佛事年至志學入觀音寺從照律師髻漆納戒抵州之醍醐寺就良範阿闍黎習毘尼稟密法太上京城遊南北講場聽性相之法捲被歸鄉一夕坐書窻暴風俄來吹滅檠燭規警爾嘆日直饒突一代特教解無量妙言不明心地焉能得醫於自己膏肓乃撥

經卷一炬燒卻徑登橫嶽拜謁南浦和尚高聲問云
佛心從來千聖不傳因甚道教外別傳浦便劈脊打
日蝦跳不出斗規云和尚卻落在圈纜作麼生別傳
的意聲未絕浦擲下拄杖以手掩其口規當下豁然
礙膺冰消卽作偈呈日蹈被大毘盧脚跟轉處殊虛
空鞭鐵馬昨夜過雲衢浦許可付衣命侍左右嘉元
初浦住都下萬壽規典輪藏及浦戰化歷遊湖海到
處主張皆稱高賓正和五年粉邑檀越結菴石城之
舊址邀爲長養休靖之地規安居餘十載獨照輝公
徒董聖福建仁之日請屈分座規起扶化豈維之龍

翔虛主席同門封疏請規出世嗣香奉大應國師拈
出畿內賢衲乘時而集住職稍久解印還鎮西延元
初膺輪請住崇福謝書記上堂達磨禪也不會夫子
字也不知不知不會無縫罅倚天長劍寒光輝直下
薦取文不加點佇思停機魚魯參差上堂崇福今夏
三百衆一日盃盂兩度供色身法身不二智食識食
共空聖凡絕跡魔外潛蹤無價得六月松風七月且
上堂拈拄杖云大火西流一葉報秋山蟬苦殘暑條
虫訴新愁只箇主丈子未曾離手頭要會此中意卓
下云蚊子上鐵牛貞和二二年再移崇福諸檀越華

石城菴成一叢林改創妙樂園滿禪寺規爲第一祖
凡住崇福十有三百收捐者修補焉失亡者全償焉
士庶懷德發心者宋光明幢之稱達于輦下遷日本
最初禪窟博多聖福彼地尊信如化佛出現焉端午
上堂善財拈出一莖艸千古教人謾度量端的機先
諸藥性應須無病入膏肓退院上堂排空闊久寂
寂出入隨緣似不曾江月松風舊相識五湖四海一
烏藤規後退居石城康安元年九月二十七日示微
恙至中夜集大衆告別書遺偈日脫身一路無古來
今朝朝日上夜夜月沈投筆長逝春秋七十七夏臘

五十八闍維收舍利靈骨塔於本山扁曰知足焉規
平日不許錄其語纔見火之門人宗吾宗應等采擁
十二編輯成卷明之承天新仲銘天寧琦楚石淨慈
俊用章靈隱良用貞爲之序跋焉

贊曰大應國師叅虛堂祖歸接學人自契師範月堂
規公棄教來問稟其瞑眩之藥從前之膏肓一時徹
髓而瘳得無礙三昧接其嗣無我與紙燭吹滅話而
喫顛于虛空焉凡天澤之門客別有生涯其活法之
相屬也十世可知焉

本朝高僧傳卷第二十九

音訓

堞徒協切 堵董五切 饜謨官切 淘徒刀切 瞎許轄切

緜力霽切 齒初觀切 鞠居六切 粹郎達切 輦女氏切

肖先弔切 趁丑慎切 依側敬切 箍攻乎切 葺七人切

欄移廉切 濺作甸切 夔渠追切 莽母黨切 撥都養切

江府住玉泉軒成九居士信施淨財錄

本朝高僧傳卷二十九

茲冀

上報四恩下資三有家道繁興種智圓明

寶永丁亥佛成道之日門人宗寺宗廟奉木

濃州路加納盛德禪寺知藏比丘識

本朝高僧傳卷第三十

濃州盛德沙門 師蠻 撰

淨禪三之十二

京兆南禪寺沙門士曇傳

釋士曇號乾峰一稱少雲筑前博多人母欲求才子

禱志賀島文殊夢大士持劍擬割其胸覺而即娠弘

安八年生頭起三峰眼如電爛幼而神異經書過目

善記嬉戲畫沙常書佛字羣兒各言其姓曇獨曰釋

氏十四入承天寺求謁南山和尚無人導引乃坐艸

上背誦尚書山聞而異之為薙染稟具待山于鎌倉

諸利應長辛亥山住東福諱曰我四十年前在此山
叅先師舉四賓主話胸次豁如爾來徧叩諸方道無
異味曇曰若四賓主則不須叅山曰你作麼生曇
曰賓主歷然山曰以何爲驗曇曰漏逗不少山休太
叅佛國禪師于淨智舉法眼答佛話國曰燒尾金鱗
卽今在什麼處曇曰當面蹉過國振威一喝曇呈偈
日一夜金峰下一喝早知平地起風雷蒼龍不臥澄
潭底爲雨爲霖徧九垓因讀廣燈錄有省會明極禪
師東渡住建長曇乃掛搭極見其氣宇極口稱曰浙
之東西不見若人小意遐方亦有奇物舉居版首結

制秉拂僧問如何是教意答曰影沈寒水鴈過長空
問如何是祖意答曰鳳凰元不在梧桐問祖意教意
畢竟如何答曰異曲同工問向上還有事否答曰八
角磨盤走空中問酬對用韻寧有古格答曰看取博
陵王見牛頭融僧云此是旁出非正傳答曰雖死蛇
能弄作活龍一時酬唱膾炙人口避元弘之擾寓上
野山院院有大般若經六百卷而失兩軸曇暗記書
之後以別本對閱不差一字訪明極於南禪極命鳴
洪鐘海衆出迎請入首座寮分座秉拂僧問曾騎鐵
馬入重城救下傳聞六國清曇曰威鳳翱翔瑞龍踊

躍僧云寺是皇朝寺僧是本朝僧適當書雲節大開
法戰場願聞太平一曲日賣刀買犢僧云三九二十
七籬頭吹觱篥不隨宮商是何曲調日嚙拍成無孔
笛僧云記得靈樹二十年不講首座意在那裏日跡
鼻端當須正石僧云曾云我首座生也生緣在什麼
處日不是河南是河北僧云我首座牧牛也莫是犯
化苗稼麼日徒勞鞭策僧云我首座行脚可謂官路
分岐日朝往西天暮歸南嶽僧云一日鳴鐘忽接韶
陽入首座寮時節到來也麼日儀封人見孔子爲木
鐸僧云堂上和尙久不講首座俄接公來與化古人

有優劣麼日毫釐有登天地懸隔僧云不審何出生
日昨日記得今朝忘却僧云牧牛又作麼生日艸茸
茸烟幕幕僧云還具行脚眼麼日臨濟退身德山斫
額僧云人天眼目堂中首座日將錯就錯及看南山
會承府帖出世相之崇壽一辦奉南山繼歷住洛之
普門安禪東福南禪相之圓覺建長上堂衆生界卽
諸佛界因迷爲衆生諸佛心卽衆生心因悟成諸佛
當頭坐斷生佛二邊直下超脫迷悟二轍直饒逗到
恁麼田地向上玄關尚未透得建長試問大衆什麼
處是向上玄關良久日前是得月樓後是逢春閣南

禪入寺小叅上堂靈山密付飲光一笑間少室單傳
 神光一臂端佛佛授手全提不起祖祖指心半提還
 難惟我日本國有城名平安古皇聖蹟巨闢禪關設
 問諸仁還委悉麼良久日九州朝禹穴四海仰堯叢
 文和四年自相歸洛有詔入內帝御清涼殿聽曇演
 法龍顏大悅丞相藤公勅菩提院為曇壽塔曇性純
 誠靈異甚多在東福時賀茂明神入室受戒并求法
 名曇乃書勝岳與之賀茂山也次日結制上堂有二青衣
 峩冠捧以玉篋奉僧伽梨日表昨夜受戒之觀侍者
 問奚自來日賀茂言訖不見曇即著其衣說法衣今在昔

提院在南禪時夢北野天神遣使贈筆求書金剛經既
 覺而雙筆在几上曇書而獻之佛國禪師三十二回
 忌夢窻石公設齋供眾請曇陞座時朱雀街有律僧
 暴死三日而蘇謂人日我行廣野見百兩車中有王
 者面如渥丹極有威嚴問之從者日閻羅大王也今
 日南瞻部洲有佛說法往預其會大將軍義詮源公
 為先考仁山居士請曇陞座僧問承聞和尚說法閻
 王來聽是否曇日認著依然不是僧日今日為仁山
 居士陞座還有閻王聞麼曇日閑神野鬼窺觀無門
 康安元年臘月十一日書偈而化日馬鳴出西天龍

樹入東海聖箭已離弦猶有返回勢世壽七十七法臘六十四空全身於菩提院塔日大定在南禪日龍興救謚廣智國師著見性義記拔關要

贊曰廣智國師壯歲還鄉追憶母之管所抵志賀島誓斷飲食誦金剛般若五千四十卷至三七且大士持劍插入口中爾後通貫三藏今觀其歌神祇之宗嚮補大般若之逸本說法句文宛轉自在豈其得生修之二報乎然此非國師之所為本旨只是妙悟之餘華也矣

備中吞海寺沙門法穆傳

釋法穆字靈岳姓藤氏本州隼島人母夢吞朝日而有娠在胎十二月而誕幼齡俊悟七歲恣父入福山教寺圓頂當受經法單思教外十二易不依閑谷雲公十七掛錫洛之建仁太公往相州叅太平準公于淨智久而不契尋見一山寧清拙澄明極俊二大老憤悱精究乾峰居福山版首穆時時請益峰董萬壽穆往依之由悅衆遷第一座結制秉拂福鹿兩山諸兄弟摩肩連袂聽其提唱莫不歎服峰遷京兆普門穆又從焉時中原騷擾盜賊盈衢慧日凌霄衆僧遁逃間爾無人穆獨切齒救其兵燹有賊脅以白刃穆無

懾色賊奪什具太穆呵土地神曰我爲佛法不惜軀
命爾責在尸素取木偶貶向壁閒越三日賊來還其
鹵掠固山鞏公住慧日招穆首於衆僧職滿寓備之
願成文和末省峰於菩提院商略宗要一夕無端打
破漆桶平筓叅得渙然冰釋辭入肥州救鹿山中誅
茅而居阻絕人烟數十里魍魅異獸之窟宅也有樵
夫日餉一椀芋羹不下山殆八年禪坐不動或至五
三日里民以爲神也移備之信藏寺魔時爲擾遂降
伏之受三歸五戒居元妙精舍究鬼託人曰我平左
大臣重盛之護持僧也願露法味所護伽藍穆爲說

法要鬼拜謝而太護法明神是也穆又開箕島之吞
海寺延文三年備之成道虛席繼日請之高臥不起
乾峰製疏促之遣大義書記付南山衣藤丞相招以
東福會有脚疾不就康安元年十二月十三日書偈
而逝日向上向下背後面前末後一句先聖頂邊壽
七十三臘五十六空獨尊之塔乾峰寤寂說偈曰馬
鳴出西天龍樹入東海又謂侍僧曰後三日靈岳亦
當謝世於是果爾故世以二師爲馬鳥隄樹再世云
日州大光寺沙門長甫傳

釋長甫字嶽翁勢州中原人叅乾峰和尚機語投契

峰付法衣偃日千佛傳來一縷頭太空縛住半肩收
當機分付嶽翁了勾引兒孫弘祖歎從此一錫行化
諸方因至日州郡主田島氏崇信其德營建一刹強
駐杖錫大光寺是也傑閣隆樓蕩摩雲烟擁毳之徒
跋涉而至除夜小叅先照後用疎影橫斜水清淺先
用後照暗香浮動月黃昏照用同時霜會欲下先偷
眼照用不同時粉蝶如知合斷魂拈拄杖卓一下曰
恁麼批判只作孤山處上詩話會不知汾陽老人開
悟門何故寒梅雪綻在前村甫於州中開六精舍興
聖大乘等也康安二年八月二日集眾垂誠書偈坐

化塔日多福

筑前顯孝寺沙門正具傳

釋正具字闡提嗣法浴之法觀寺救海和尚明菴禪
師六世之孫也初住法觀聞法者多江州太守藤貞
宗大友氏聘請董豐之萬壽包笠峰集檀越又筑前
州建顯孝寺請具為開祖鎮西道俗傾誠歸禪臨終
偈曰離卻殼漏處處相見馬腹驢胎日面月面

京兆東福寺沙門至孝傳

釋至孝號無德姓藤氏越前平葦人妙年卜京拜無
為元和尚圓頂進具時會中皆江湖俊髦頭角崢嶸

孝不能頡頏憤然東遊歷叅叢社勵志習學僅歷三
載宗說兼通且精于易義辯縱橫氣壓諸方聞虎關
鍊公掌東福大藏秉拂欲法戰一場入浴至期出眾
問答往返百轉時無爲住持憚一會久立携而入眾
孝嚴後版曰面前較此子背後打不著其言句唱酬
人天聳聽王性鯁直每謂人曰越國人無靈性唯鍾
於我耳應貞元年春無爲宋于審滿茶毘感舍利諸
徒歎異孝請言曰諸老有舍利者多爲時人所疑當
決其真僞取直礎上鐵鎚擊之礎鎚共陷舍利無損
壞元弘元年二仙和尚舉爲南禪之第一座俄有詔

命版首秉拂聖駕臨筵凌晨大雪孝垂語曰雪覆千
山孤峰不白異中之異一任探索問答罷乃日曉樹
放開花意思夜窻擦起月精神冷冰冰地纔知有平
地依然埋沒人所以少室峰前表真像假鰲山店上
表假像真知道從門人者真個不是家珍只如不通
凡聖把斷要津又作麼生擊拂子曰陽氣發時無硬
地嶺梅先放十分春帝心大悅秉拂垂語曰語默涉
離彼是非徒爾爲若能通不犯開合任脣皮問答既
畢乃日圓覺伽藍紅塵紫陌平等性智綠水青山時
時具足日日團圓西天蠟人瞞它自瞞東土鐵彈好

肉徒剋鳴那舍元殿裏誰敢更問長安拍膝日午窻
已愛槐楓潤夜樹猶聞麥雨寒結夏乘拂陞座日摩
訶衍法離四句絕百非大小仰山白日寐語作麼克
由耐耐過者邊看衲僧門下我愛吾廬檻前山滾水
寒天際日上月下且要同此禁足同此安居啜近日
王令稍嚴不許攙行奪市正中三年朝旨諡無爲曰
智海禪師孝奏請加大字朝議以無例不許孝重奏
引清涼大法眼禪師證焉於是制可初住城北北禪
寺曆應二年大將軍尊氏源公管天下兵馬之權嘗
謂安國利民莫如佛藥乃令各州置安國寺先改北

禪爲京之安國遷四條大宮之西列于十刹以孝爲
興建開山緇白靡隨有窟六觚石幢於桂河側者往
告夢窻國師使人洗磨題曰尊勝幢又有雕造沙門
安國之六字甚鮮餘漫漶不見斯乃管檀林皇后遣
沙門慧萼入唐迎義空禪師創安國寺唱佛心宗萼
重入唐雇鈔筆書尊勝陀羅尼經刻之貞石以鎮國
家者也國師贈孝曰想天和尚再世義空也孝置寺
之巽隅廬其上扁窻幢東傳祖公作記證之源公喜
曰兆已如此國其安矣遷董東福又住讚州長興寺
帝敕興南禪貞治二年正月十一日化于窻幢院春

秋八十

京兆建仁寺沙門圓旨傳

釋圓旨字別源自稱縱性越前平氏也母依無嗣禱藥師佛像夢吞明珠有孕永仁二年冬十月生齡歲隨父郡之帆山寺瞻禮觀音像大喜又見寺僧忻然如舊識歸求出家父母知是夙緣隨志遂依佛種寺竹菴圭和尚為童行十六鬚具一日圭謂日觀汝氣宇不當久滯村院頃聞東明日和尚來自元國盛以洞宗唱于東關亟往拜之旨受命而行時明主圓覺一面許叅堂執持十二載純壹叅詳師資契投元應

二年附舶入元謁一時英衲古林茂雲外岫中峰本無見觀靈石芝古智哲竺二田心南楚悅龍巖真般若誠等當機不讓咸器稱之嘗在鳳臺古林會中掌藏秉拂一衆屬目以元至順庚午回任圓覺後版轉建長前版康永初還越州胡舍金吾開弘祥寺延為第一世赴鎮西壽勝之請明年返弘祥又有檀越創善應吉祥二寺奉為開山第十世文和三年東陵嶼和尚住南禪封書邀招旨作偈題善應可休亭日孤松三尺竹三竿招我時時來倚欄細雨隨風斜入座輕煙籠日薄遮山沙田千畝牛馬瘦野水一溪鷗鷺閑

自笑可休休未得浮雲出岫幾時還及抵龍山分座
說法延文二年承鈞旨匡洛之真如翌歲患脚疾解
印歸越貞治二年大將軍義詮源公以建仁請公命
荐至旨不得已力疾應之九日上堂籬邊不見白衣
客爭得淵明興味濃今日黃花應笑我白頭扶病上
東山十一日晚參罷病革鳴鼓離衆諸尊宿詣室問
疾旨應接如常國醫診視謂必不待明日旨笑曰吾
精神未耗尚可待三十日有求偈贊者走筆應之十
月朔日大將軍遣使慰問陞弘祥寺位列諸山重其
道義也初八日諸弟子就建仁東偏築塔基構菴日

洞春興至塔所旨環視曰此地鄰于允禪師入定之
處老僧歸此不亦幸乎招中巖月八日後事煩老兄
耳至十日三鼓更衣書偈坐化閻世七十有一坐夏
五十有六諸子瘞全身於壽塔院日定允旨頌偈甚
多以作者鳴有南遊東歸二集天童雲外岫南禪清
拙澄竺仙仙及東明著語稱讚今傳于叢林

贊曰別源和尚觀光元國逢一時龍象往復示義悟
解無翳而才章有餘其離文字性也顯述作中矣

若州高成寺沙門法延傳

釋法延字大年豫州藤姓子蚤脫塵累暨圓具足經

行四方徧見諸大老叅竺仙和尚于淨妙一言之下
頓釋疑情仙印可之付以從上的傳之衣擢充版首
後入京師大將軍尊氏源公嚮其道風源公慕僚伊
豫刺史大高重成於若州治內革放寺爲禪刹聘延
爲開山之祖高成寺是也德馨發越緇白鳥集以貞
治二年十月初二日端坐示宗

京兆真如寺沙門齊哲傳

釋齊哲字明交文保二年與復菴已無隱晦古先元
等踰海入元叅中峰本禪師于天目山辛勤得旨徧
蹈名利講一時知識嘉曆初偕鄉友六人與清拙和

尚同船而歸掛錫建仁時竺仙仙公住建長與哲在
冷泉時舊識也哲訪福山相得互驪呈五偈公仙次
韻送之其一日誰復于今話道情不堪相送出門行
斷腸過似聞猿日墮淚無因霜夜聲首住維之真如
爲中峰慈香次徒甲之慧林後闢正法寺爲始祖枯
禪清薄頗有古人之風別源旨公贈偈日開堂演法
聽敷揚一朵優曇世上香幻住老人鼻無竅只將天
日見祥光貞和三年七月二日逝矣

京兆南禪寺沙門慈均傳

釋慈均號平田不詳姓氏相州鎌倉人徧遊講肆知

解甚博。後上京師，參慧日道山晟禪師，得單傳旨。早有南遊之志，嘗瀝指血書五部大乘經，年二十七遠抵金陵，謁古林茂公。林問祖意，敬意是同，是別。均豎起拳頭，林便喝。均亦喝，掀倒禪牀。林呼侍者曰：參堂。太均便辭。太見中峰本于天目，月江印于何山，又遊靈石芝竺，雲曇無言，宜清拙。澄雪竇常鷹山泳之門，皆盡之。均遊天台，常公送偈曰：大唐國裡無禪師，航海東來要見誰。此太天台如問路，平田婆子不相欺。既及東歸，曆應二年，冬出世。豐之崇禪嗣香，酬道山。歷遷播之圓應，洛之普門，東福，延文二年夏，詔陞南。

禪上堂，膏雨促，畊田春風二月，天野梅翻落雪，牆柳未飛，綿黃鳥浚林，語白牛露地，眠優遊，聲色裡且說老婆禪。卓拄杖曰：不會待驢年，半夏因建新浴室。上堂前半夏已過，少處不減，後半夏未來，多處不添，不添不減，九九何曾八十一，六六不成三十六，攪得百千香水海，遠塵離垢，常三昧，跋陀婆羅笑點頭，舜若多神身無礙也。大筌也大奇，金剛與泥人，指背退休，龍吟菴臨，順世書偈，日生久公來無此，無被明月行空，清風頂地，置筆而化。時貞治三年九月十六日，樹塔南禪之雲興菴有語錄一卷。

京兆南禪寺沙門邵元傳

釋邵元號古源俗姓源氏越前人初侍南山雲公後依雙峰源和尚遂承密契嘉曆二年元見樵隱逸於雪峰問法呈偈太登天台禮無見覩以語未通疏筆來意覩誦呵曰你有什麼閑工夫至如此語妙激發誘誨至方廣寺度石橋供茶羅漢感感中現萃謁斷崖義於天且參千巖長於龍山就需法語長劈胸一拳曰吾者裡無法語元日謝和尚法語爾後每見元暨奉示之因有所啓發禮中峰國師塔投宿塔下夢國師親爲說法舉教中云妙性圓明離諸名相元

感激不已留數日太遊五臺山見聖光接身人皆驚異元在玉泉少林居版首寓二祖菴菴上常有紫雲作蓋人怪跡之唯見元宴坐會朝廷選僧百員禁中轉大藏元預焉後居水月閱大般若經忽夢母氏因然指誓曰我母若存則身心康安也則超昇樂土在元二十一年以本朝貞和丁亥而歸母已太世計其日乃現夢之時也依夢窻國師居天龍前堂貞和三年住洛之大聖十香供雙峰次移等持東福及播之法雲丞相藤公請再住東福指門曰此門廣大合容法界是聖是凡出入無礙喝一喝曰汝等諸人爲什

麼在門外上堂我本無心有所希求今法王大審自
然而至所以道欲識佛性義當觀時節因緣時節既
至其理自彰直得慧日峰頭嫩桂抽枝偃月橋邊清
風匝地祖師心印一印印定古佛家風八字打開一
一靈明天真物物現成受用祖道大行王道大統山
蒼蒼水茫茫但見皇風成一片不知何處立封疆退
休南泉菴貞治二年十一月十一日因病書偈曰未
後一句始到牢關擊碎鐵壁踢倒銀山呵呵書訖
去宋世壽七十一元號如如道人又稱物外子

京兆南禪寺沙門智明傳

釋智明號蒙山不詳姓氏攝州玉造縣人方眸恃怙
俱寇元國萬戶將軍降在本州頗博識之士也愍明
幼孤養以爲子操鄉音教四書明性敏黠就口能誦
鄉黨相勸投施藥院薙染習毘尼法厭其細瑣十六
棄公依規菴和尚于南禪示以本來面目公案坐臥
注念不捨寸陰卒徹父母未生已前事曲司藏鑰秉
拂垂語日減龜焚舟用盡機籌單刀直入要見俊流
菴稱善菴滅後一山和尚踵席以明充書記禪冊中
所未論者不須重譯而質之靡不通曉嘉曆未振錫
入相州到處禪利待以伉禮明極和尚住鹿福間舉

居第一座會中龍象極衣請益既而杜闢閱毘盧大藏經寢疾于福山之宗蒲作問吟十偈有地水火風元屬我孤燈相對眼如翬之句清拙竺仙序跋賞焉曆應初大將軍尊氏源公聘請開法筑之聖福辦香供規菴一居六載解印入洛左武衛將軍源直義延見問法恨相知之晚乃董建仁尋興南禪以臘德高四衆斗仰如百川歸宗擢上乘院爲苑裏地大將軍義詮源公爲先妣一品夫人講明陞座闡揚宗要後光嚴帝臨幸其第垂簾睿聽皇情大悅敕賜金字法華經一部水精念珠一臂錦被三領明自少至老日

課法華經一部寒暑無闕每夏講首楞嚴辭辯無礙聽者忘勦一日示疾遺誡門人書偈曰住妄想境滿九十年虛空崩裂倒上梵天擲筆卽化時貞治五年八月二十日也世齡如偈法臘七十又五火浴五色設利爛然以平生所持楞嚴殉于閣維而無欲二字不盡見聞歎異門人琢水精輪列中與舍利俱安之字畫炳然見于外號無欲舍利塔焉

京兆南禪寺沙門元晦傳

釋元晦字無隱豐前州人遍歷本邦叢社又遊元國參天白山中峰和尚公謁諸尊宿旋止中峰錫下遂

得悟達泰定三年與清拙和尚同船而歸拙住建仁
晦爲第一座江州太守大友直菴居士聘請開法築
之顯孝嗣香供中峰歷遷聖福及相之圓覺建長洛
之建仁說法提唱如雷破柱寺衆僉曰開山千光國
師再生王臣歸嚮輦下傳風有詔董南禪緇白瞻禮
不絕壹州檀越創安國寺晦爲第一世後歸粉里建
天目寺卻掃養老凡學人有所問晦曰趙州因甚道
個無字學人擬開口晦便怒罵以延文三年十月十
七日宋子福智寺教誡法雲晉濟禪師

相州建長寺沙門妙悅傳

釋妙悅字可翁大友氏日州人也叅仕佛國禪師久
而機契出遊名區抵遠之貞永寺訪玉峰圭公因賦
一律曰遠江名利甚清鮮此土徑山日本東南北佛
樓高聳嶽東西靈水淡湛深三塗趣類脫三惡七谷
風煙橫七峰到此難成常樂夢嶺松風徬數更鐘後
承府帖出世建長一香供佛國僧中鸞鳳集天下禪
林構正本菴爲終焉處某年八月二十二日書偈而
化偈載延壽傳燈錄

上州長樂寺沙門得藏傳

釋得藏號放外叅明極俊和尚發明心機出世攝之

棲賢移上之長樂高識博辯快若懸水毳侶輻湊得實而歸上室靈光獨耀迴脫根塵上士悟之明中不見跡下士迷之暗裏施文彩所以道三級浪高魚化龍癡人猶岸夜塘水且道迷悟明暗作麼生分向下文長且待來日藏遊化諸方在常州鹿島菴根本寺而居景治四年正月三日化于長樂霽光院

賀州大藥寺沙門素哲傳

釋素哲字明峰能州人或曰京兆幼出家台嶺長封搭建仁後往賀州慈瑩山瑾公山見其器度命司侍尚逮山遷諸刹參侍影附常喚哲侍者哲應諾山曰是甚

麼哲終不契如是喚者二十許年猶如香林遠公於雲門也一日悟徹山問日有一人能變作萬物你還知麼哲曰知之久矣山曰皮膚脫落盡只有一真實又作麼生哲曰本不脫落何有真實山領之印可因請益達磨不識話山乃付書參同州傳燈寺恭翁禪師翁相見畢都無宗說只申寒溫耳哲亦不舉話七宿而太翁返簡曰這僧參徹不識話也山以說示哲曰明眼宗師有發藥也山開永光命哲分座尋屬日因緣正熟時節亦至徐宜代我繼大乘席乃付傳來衣說偈曰永光燈下列焰人照破劫空氣象新凸

出明峰難藏匿全功轉側露全身背頂受衣偈亦呈
 偈曰永平付法傳衣信嫡嫡師資面授來東嶺誰言
 提不起而今著得化門開遂住大乘寺移永光越之
 檀越勅光禪寺延為開山始祖二歲道場風規真密
 叅徒歸心觀應元年三月二十八日示疾撞鐘聚眾
 書偈而化壽七十有四臘五十有八門人火浴分金
 利靈骨塔于大乘永光禪寺有嗣其法者二十
 餘員

能州洞谷山沙門了光傳

宗前

釋了光字寂室侍堂山和尚于總持叅無涯洪公于

賀之常住一日涯問子還就父時如何光曰今日親
 入室涯寫之稟承印訣出世洞谷山洞上學賓日盈
 寮內有弟子宗可字中庭幼從寂室得五位之祕訣
 泛海入元徧謁濟洞諸老登太白山拜長翁淨禪師
 塔先是有雕乃祖道元和尚牌入南谷菴祖堂者歲
 月已久牌亦湮沒可命工刊牌再入祖堂後在發之
 雙林叅明極修禪師極問汝叅諸方必有付授若有
 呈露老僧是則與汝證明不是則刻卻可展兩手曰
 是什麼極休去及辭歸東極書法語贈之可出世洞
 谷有弟子七人

谷京兆南禪寺沙門永璵傳

釋永璵元國四明人東陵其號也自少參方隨天童雲外岫和尚得洞上之宗開法本州天寧學徒奔歸常志遊扶桑而無由渡海至正十一年春崑山客謂日大倉縣有往日本船璵欣然整包附載來過風順濤穩經三旬餘著博多津本朝觀應二年也憩聖福寺秋七月入都謁夢隱國師寤其遠涉延館西芳蘭若待遇深懇會玄無極謝天龍事國師亦坐病牀卽屬璵以寺務上堂未離南土日日青夫既到扶桑山長水遠應緣而住似鏡臨形幸無彼此之分那有太

來之間若使提持綱要接物利生豈是小事況茲山乃奉後醍醐帝道場實大國師開山力建真獅子窟非驢所堪退讓出於至公不免經過俗路且道卽心卽佛非心非佛不是心不是佛不是物又且如何話會溪山各異雲月是同只如今日開堂祝聖一句如何舉似但見皇風成一片不知何處是封疆明年秋奉詔遷南禪上堂若論此事如某日當空無幽不燭法法皆是真乘物物悉爲妙用廓人夫正眼控佛祖玄機截斷衆流更無回互心外無法法外無心坐斷十方壁立萬仞且道明功偕位玉轉珠回開堂祝聖

奇特一句作麼生道四方盡沐無爲化萬姓咸哥樂
太平晚叅上堂南泉十八上解做活計趙州十八上
破家餓宅二老未免作得失商量山僧遠來茲土老
老大大公羊蒙天龍國師以爲出格上流交代在持
今年承左大將軍以爲遠方禪衲補席南禪院西
邊筑籬拈得東邊木杓但得有鹽有醬有米有柴日
然國家安和說甚人我非是卻不得平地生堆無風
起浪何故事無大小當心者憂復舉馬祖問藥山曰
見處如何山曰皮膚脫落盡惟有真實在祖曰子之
所得可謂恻於心體布於四肢既然如此宜將三條

篋束取肚皮隨處住山公輒成一頌藥山病在皮膚
上馬祖攻放入腹心卻把肚皮二篋束看佗真色是
黃金璣在大仰與清拙友善及至此方大鑑遷化璣
大息不已因作塔上之銘璣後住相之圓覺建長化
導甚盛貞治四年五月六日吉祥而逝塔於南禪寺
西雲菴朝廷崇德赦諡妙應光國慧海慈濟禪師之
於貽厥故行實不全焉

贊曰禪祖之來自支那者慮十有五人皆是一時
英傑也歷遷五岳宗規傳世璣公殿後來唱新豐曲
禪海之深雖不及古而非今時明僧之類然觀其署

述間有所蔽於詖辭為璵公慙之學者詳焉

本朝高僧傳卷第三十

西... 述間有所蔽於詖辭為璵公慙之學者詳焉

音訓

挿 測洽切 悱 敷凡切 闕 苦臭切 切 干結切 瘳 蘇典切

脅 虛業切 懾 質涉切 鹵 上郎古切 下力 魍 魍 上抽

下莫切 殼 漏 上乞切 擠 饑西切 讎 多曩切 礎 諸溪切 禱 漫

漶 上莫半切 下胡 雇 古慕切 指 丘皆切 嫩 奴困切 恃

怙 上時吏切 下候古切 操 七到切 雜 丈凡切 伉 口浪切 杜 徒古

也 空胡切 虛 炳 補永切 深 徂紅切 厚 荒故切 凸 訥

切 輿 雲俱切 犒 口到切 控 苦貢切 鹽 移廉切 醬 子亮

篋 彌列切 柝 兵媚切 詖 兵媚切

江府住玉泉軒成九居士信施淨財鏤

本朝高僧傳卷三十

茲冀

上報四恩下資三有家道繁興種智圓明

寶永丁亥佛成道之日

濃州路加納盛德禪寺

知藏比丘

識

終

